



補注蒙求

一











據上海圖書館藏宋刻本影  
印原書版框高十八釐米寬  
十三·五釐米





十三、五、...

...

...




Vertical columns of text in seal script, including a title at the top left and a signature at the bottom left.



補注蒙求卷第



王戎簡要裴楷清通



晉書王戎字濬冲琅邪臨沂人幼而穎悟神彩秀

徹視日不眩裴楷見而目之曰戎眼爛爛如巖下

雷既籍素與戎父渾為友戎年十五隨渾在郎舍

少籍二十歲籍與之交籍每適渾去輒過視戎良

久然後出謂渾曰濬冲清賞非卿倫也共矧言不

如共阿戎談歷官至司徒裴楷字叔則河東聞

喜入明悟有識量少與戎齊名鍾會薦於文帝辟

相國掾及吏部郎缺帝問會會曰裴楷清通王戎

簡要皆其選也於是用楷楷風神高邁容儀俊爽

博涉羣書特精理義時謂之玉人又稱見叔則如

近玉山映照人也轉中書郎出入宮省見者肅然

改容武帝登阼探策以卜世數多少既而得一不

悅羣臣失色楷曰臣聞天得一以清地得一以寧

五侯得一以為天下貞帝大悅累遷中書令侍中

孔明卧龍呂望非熊

蜀志諸葛亮琅邪陽都人躬耕隴畝好為梁父吟

每自比管仲樂毅時人莫之許惟崔州平徐庶與

亮友善謂為信然時先主屯新野徐庶見之謂曰

諸葛孔明卧龍也將軍豈願見之乎此人可就見

不可屈致宜在駕顧之先主遂詣亮凡三往乃見

因屏人與計事善之於是情好日密關羽張飛等



不悅先主曰孤之有孔明猶魚之有水也願勿復  
言及稱尊號以亮為丞相漢晉春秋曰亮家南陽  
鄧縣襄陽城西號曰隆中 六韜曰文王將田史  
編布卜曰田於渭陽將大得焉非龍非虜非虎非  
羆非得公侯天遺汝師以之佐昌施及三王文王  
曰兆致是乎史編曰編之太祖史疇為禹占得臯  
陶兆比於此文王乃齋三日田於渭陽卒見太公  
坐茅以漁文王勞而問之乃載與俱歸立為師舊  
本作非熊非羆疑流俗承誤後世莫知是正耳按  
後漢崔駰達旨辭曰或以漁父見兆於元龜注云  
西伯出獵卜之曰所獲非龍非驪非熊非羆所獲  
霸王之輔所謂非熊蓋本諸此

揚震關西丁寬易東

後漢揚震字伯起弘農華陰人少好學明經博覽  
無不窮究諸儒為之語曰關西孔子揚伯起常客  
居於湖不荅州郡禮命數十年衆謂之晚暮而志  
愈篤後有冠雀啣三鱸魚飛集講堂前都講取魚  
進曰蛇鱸者卿大夫服之象也數三者法三台也  
先生自此升矣年五十乃始仕州郡安帝時為太  
尉 前漢丁寬字子襄梁人初梁項生從田何受  
易時寬為項生從者讀易精敏材過項生遂事何  
學成東歸何謂門人曰易以東矣寬復從周王孫  
受古義號周氏傳景帝時為梁孝王將軍距吳楚  
作易說三萬言訓故舉大誼而已



謝安高潔王道忠

晉書謝安字安石陳國陽夏人年四歲桓彝見而嘆曰此兒風神秀徹後當不減王東海王導亦深器之由是少有重名初辟除並以疾辭有司奏安被召歷年不至禁錮終身遂棲遲東土常往臨安山中放情丘壑然每遊賞必以妓女從時弟萬爲西中郎將總藩任之重安雖處衡門名出其右有公輔望年四十餘始有仕進志征西大將軍桓溫請爲司馬朝士咸送中丞高崧戲之曰卿屢違朝旨高卧東山諸人每相與言安石不肯出將如蒼生何蒼生今亦將如卿何安有愧色後拜吏部尚書時孝武立政不自己桓溫威振內外安盡忠匡翼然能輯穆進中書監錄尚書事符堅率衆次淮肥加安征討大都督既破堅以摠統功進太保薨贈太傅謚文靖 晉書王導字茂弘光祿大夫覽之孫少有風鑒識量清遠陳留高士張公見而奇之謂其從兄敦曰此兒容貌志氣將相之器也元帝爲琅邪王與導素相親善導知天下已亂遂傾心推奉潛有興復之志帝亦雅相器重會帝出鎮下邳請導爲安東司馬軍謀密策知無不爲帝常謂曰卿吾之蕭何也累遷中書監錄尚書事及帝登尊號百官陪列命導升御牀共坐導固辭曰若太陽下同萬物蒼生何由仰照帝乃止進位司空匡衡鑿壁孫敬閉戶



前漢匡衡字稚圭東海人也父世農夫至衡好學家貧傭作以供資用尤精力過絕人諸儒為之語曰無說詩匡鼎來匡語詩解人頗射策甲科元帝時為丞相西京雜記曰衡勤學無燭鄰舍有燭而不逮衡乃穿壁引其光而讀之邑大姓文不識名家富多書衡乃與其客作而不求償願得書遍讀之主人感歎資給以書遂成大學 楚國先賢傳孫敬字文寶常閉戶讀書睡則以繩繫頭懸之梁上嘗入市市人見之皆曰閉戶先生來也辟命不就

至都蒼鷹窳成乳虎

前漢至都河東大陽人景帝時為中郎將敢直諫

面折大臣於朝遷中尉是時民樸畏罪自重而都獨先嚴酷致行法不避貴戚列侯宗室見都側目而視號曰蒼鷹拜鴈門太守匈奴素聞都節舉邊為引去竟都死不近鴈門匈奴至為偶人象都令騎馳射莫能中其見憚如此匈奴患之乃中都以漢法卒斬之 前漢窳成南陽穰人以郎謁者事景帝好氣為小吏必陵其長吏為人上操下急如束溼為中尉其治效至都其廉弗如武帝即位徙為內史外戚多毀其短抵罪後上欲以為郡守公孫弘曰臣為小吏時成為濟南都尉其治如狼牧羊不可使治民上乃拜為關都尉歲餘關東吏隸郡國出入關者號曰寧兒乳虎無值窳成之怒其



暴如此

河嵩狼抗梁冀跋扈

晉書周嵩字仲智兄顓字伯仁汝南安成人中興時顓等並列貴位嘗冬至置酒其母舉觴賜三子曰吾本渡江託足無所不謂爾等並貴列吾目前吾復何憂嵩起曰恐不如尊旨伯仁志大而才短名重而識闇好乘人之弊非自全之道嵩性抗直亦不容於世唯阿奴碌碌當在阿母目下耳阿奴嵩弟謨小字也後顓嵩並為王敦所害謨歷侍中中護軍世說抗直作狼抗晉書周顓傳處仲剛愎彊忍狼抗無上處仲王敦字也後漢梁冀字伯卓襲親愍侯竦之元孫為人鷲肩豺目洞精矐眦口吟舌言拜大將軍侈暴滋甚冲帝崩冀立質帝帝少聰惠知冀驕橫嘗朝羣臣曰冀曰此跋扈將軍也冀聞深惡之遂鳩殺復立桓帝而在害太尉李固杜喬海內嗟懼其四方調發歲時貢獻皆先輸上第於冀乘輿乃其次焉一門前後七封侯三皇后六貴人二大將軍在位二十餘年窮極滿盛威行內外百僚側目莫敢違命天子恭己不得有所親豫帝既不平之後發怒誅冀中外宗親無長少皆棄市他連及公卿列校刺史二千石死者數十人故吏賓客免黜者二百餘人朝廷為空收冀財貨三十餘萬萬以充王府用斂天下稅租之半



郗超髯參王珣短簿

晉書郗超字景興太尉鑒之孫少卓犖不羈有曠  
世之度善談論義理精微大司馬桓溫辟為參軍  
溫英氣高邁罕有所推與超言常謂不能測遂傾  
意禮待超亦深自結納時王珣為溫主簿亦為溫  
所重府中語曰髯參軍短主簿能令公喜能令公  
怒超髯珣短故也 王珣字元琳丞相導之孫弱  
冠與謝玄為溫掾溫嘗謂之曰謝掾年四十必擁  
旄杖節王掾當作黑頭公皆未易才也孝武時為  
僕射領吏部帝雅好典籍以才學文章見昵夢人  
以大筆如椽與之既覺語人曰此當有大手筆事  
俄而帝崩哀冊謚議皆珣所草玄字幼度少穎悟  
為叔父安所器重安嘗戒約子姪因曰子弟亦何  
豫人事而正欲使其佳諸人莫有言者玄荅曰譬  
如芝蘭玉樹欲使其生於庭階耳安悅時符堅入  
寇朝廷求文武良將可以鎮禦北方者安乃以玄  
應舉累進冠軍將軍為前鋒都督與從弟輔國將  
軍琰決戰肥水南堅眾奔潰棄甲宵遁聞風聲鶴  
唳皆以為王師已至進號前將軍

伏波標柱博望尋河

後漢馬援字文淵扶風茂陵人少有大志嘗謂賓  
客曰丈夫為志窮當益堅老當益壯建武中歷虎  
賁中郎將數被進見為人明鬚髮眉目如畫閑於  
進對又善兵策帝嘗言伏波論兵與我意合有謀



未嘗不用後交阯女子徵側等反蠻夷皆應之拜  
援爲伏波將軍擊破之封新息侯援乃擊牛醢酒  
勞饗軍士將樓船戰士進擊餘黨嶠南悉平後復  
請擊武陵五溪蠻夷時年六十二帝愍其老援曰  
臣尚能被甲上馬帝令試之援據鞍顧眄以示可  
用帝笑曰矍鑠哉是翁也遂遣征之進營壺頭會  
暑其中病卒廣州記曰援到交阯立銅柱爲漢之  
極界前漢張騫漢中人建元中爲郎武帝方欲  
事滅胡迺募能使者騫應募使月氏徑匈奴留十  
餘歲持漢節不失因與其屬亡鄉月氏後亡歸拜  
太中大夫騫身所至者大宛大月氏大夏康居而  
傳聞其旁六國五六具爲天子言其地形所有元  
朔中以校尉從大將軍擊匈奴知水草處軍得以  
不乏封博望侯贊曰禹本紀言河出昆侖昆侖高  
二千五百里餘日月所相避隱爲光明也自張騫  
使大夏之後窮河源惡睹所謂昆侖者乎舊注云  
得支機石歸未詳所出

李陵初詩田橫感歌

前漢李陵字少卿前將軍廣之孫少爲侍中建章  
監善騎射愛人謙遜下士甚得名譽武帝以爲有  
廣之風拜騎都尉天漢二年將步卒五千人征匈  
奴戰敗遂降焉初陵與蘇武俱爲侍中武使匈奴  
明年陵降後昭帝立與匈奴和親武得還漢陵以  
詩贈別曰攜手上河梁游子暮何之徘徊躑躅路側



恨恨不得辭晨風鳴北林熠燿東南飛浮雲日千里安知我心悲武別陵詩曰雙鳧俱北飛一鳧獨南翔子當留斯館我當歸故鄉一別如秦胡會見何詐央愴恨切中懷不覺淚霑裳願子長努力言笑莫相忘五言詩蓋自此始○前漢田橫狄人故齊王田氏之族秦末自立為齊王漢將灌嬰敗橫軍遂平齊地橫懼誅與其徒居海島中高帝召之迺與其客二人乘傳詣洛陽謝使者曰橫始與漢王俱南面稱孤今王為天子而橫為亡虜其愧已甚遂自剄令客奉其頭奏之高帝為之流涕以王禮葬之拜其二客為都尉既葬二客穿其冢旁皆自剄其餘五百人在海中聞橫死亦皆自殺李周翰曰橫自殺從者不敢哭而不勝哀故為悲歌以寄情後廣之為薤露蒿里歌以送終至李延年分為二等薤露送王公貴人蒿里送士大夫庶人挽柩者歌之因呼為挽歌

武仲不休士衡患多

後漢傅毅字武仲扶風茂陵人少博學肅宗博召文學之士以毅為蘭臺令史拜郎中與班固賈逵共典校書毅追羨明帝功德最盛而廟頌未立乃依清廟作顯宗頌十篇奏之由是文雅顯於朝廷魏文帝典論曰文人相輕自古而然傳毅之於班固伯仲之間耳而固小之與弟超書曰武仲以能屬文為蘭臺令史下筆不能自休晉書陸機字



士衡吳郡人大司馬抗之子身長七尺其聲如鍾  
少有異才文章冠世與弟雲俱入洛造太常張華  
華素重其名如舊相識曰伐吳之役利獲二俊遂  
薦之諸公又詣侍中王濟濟指羊酪謂曰吳中何  
以敵此荅云千里尊羹未下鹽豉時人稱為名對  
機天才秀逸辭藻宏麗華嘗謂之曰人之為文常  
恨才少而子更患其多弟雲嘗與書曰君苗見兄  
文輒欲燒其筆硯華薦之諸公累遷中書郎後成  
都王穎起兵討長沙王又假機後將軍河北大都  
督機以羈旅入官頓居羣士之右皆有怨心諧之  
於穎穎怒使人收機機歎曰華亭鶴唳豈可復聞  
乎遂遇害初機有駿犬名黃耳既羈寓京師久無  
家問笑語犬曰我家絕無書汝能齎書取消息否  
犬搖尾作聲機乃為書以竹筒盛之繫其頸犬尋  
路南走遂至家得報還洛後以為常

相譚非識王商山詭

後漢相譚字君山沛國相人好音律世祖即位拜  
議郎給事中後詔會議靈臺所處時帝方信識多  
以決定嫌疑謂譚曰吾欲識決之何如譚曰臣不  
識識帝問其故譚復極言識之非經帝大怒曰譚  
非聖無法將下斬之叩頭流血乃得解出為六安  
郡丞卒前漢王商字子威涿郡蠡吾人成帝時  
為左將軍京師民無故相驚言大水至百姓奔走  
相蹂躪老弱號呼長安中大亂天子召公卿議大



將軍王鳳以為太后與上及後宮可御船令吏民  
上長安城以避水商曰自古無道之國水猶不冒  
城郭今政治和平世無兵革上下相安何因有大  
水暴至此必訛言上西止果訛言上美壯商之固  
守數稱其議而鳳大慙後為丞相為人多質有威  
重長八尺餘身體鴻大容貌過人單于來朝商坐  
未央廷中單于前拜謁商仰視大畏之遷延却退  
上聞歎曰真漢相矣鳳怨商陰求其短卒為所中  
免相薨

稽呂命駕程孔傾蓋

晉書嵇康字叔夜譙國鉅人性巧而好鍛宅中有  
一柳樹甚茂乃漱水園之每夏月居其下以鍛東  
平呂安服其高致每一相思輒千里命駕康友而  
善之家語曰孔子之鄰遭程子於塗傾蓋而語  
終日甚相親願謂子路曰取束帛以贈先生

劇孟一敵周處三害

前漢劇孟洛陽人以俠顯吳楚反時條侯周亞夫  
為太尉東將至河南得劇孟喜曰吳楚舉大事而  
不求劇孟吾知其無能為已天下騷動大將軍得  
之若一敵國 晉書周處字子隱義興陽羨人膂  
力絕人不修細行州曲患之處自知為人所惡慨  
然有改勵之志謂父老曰今時和歲豐何苦而不  
樂父老歎曰三害未除何樂之有處曰何謂也答曰  
南山白額猛虎長橋下蛟并子為三矣處曰吾能



除之乃入山射殺猛虎投水搏殺蛟遂勵志好學  
有文思志存義烈忠信克己其年州府交辟  
仕吳為御史中丞凡所糾劾不避寵戚及氏人齊萬  
年反朝臣惡處彊直皆曰處名將子忠烈果毅乃  
使隸夏侯駿西征伏波將軍孫秀謂之曰卿有老  
母可以此辭處曰忠孝之道安得兩全既辭親事  
君父母安得而子乎已而戰敗左右勸退處按劍曰  
此吾效節授命之日何退之為且古者良將受命凶  
門以出蓋有進無退也諸君負信勢必不振我為大  
臣以身徇國不亦可乎遂力戰而沒追贈平西將軍  
胡廣補闕袁安倚賴

四十四

後漢胡廣字伯始南郡華容人察孝廉試章奏安

帝以廣為天下第一累為三公年已八十而心力  
克壯性溫柔謹素常遜言恭色達練事體明解朝  
章雖無蹇直之風屢有補闕之益故京師諺曰萬  
事不理問伯始天下中庸有胡公及共李固趙戒  
杜喬議立清河王蒜而蠹吾侯志取梁冀妹冀欲  
立之廣戒憚冀皆曰惟大將軍令獨固與喬堅守  
本議竟立蠹吾侯是為桓帝以此譏毀於時自在  
公台三十餘年歷事安順冲質桓靈六帝凡一履  
司空再作司徒三登太尉又為太傅其所辟命皆  
天下名士與故吏陳蕃李咸並為三司蕃等每朝  
會輒稱疾避廣時人榮之 後漢袁安字邵公汝  
南汝陽人嚴重有威見敬於州里肅宗末為司空



遷司徒和帝時薨初安以天子幼弱外戚擅權每朝會進見及與公卿言國家事未嘗不噫嗚流涕自天子及大臣皆倚賴之及薨朝廷痛惜焉初安父沒訪求葬地道逢三書生問安何之安告之生乃指一處云葬此地當世為上公須臾不見安異之於是葬其地故累世隆盛

黃霸政殊梁習治最

前漢黃霸字次公淮陽陽夏人武帝末以待詔入錢賞官補侍郎謁者後復入穀補左馮翊二百石卒史馮翊以霸入財為官不署右職使領郡錢穀計簿書正以廉稱宣帝時擢揚州刺史以賢良高第為潁川太守力行教化而後誅罰外寬內明得

四

世

一

明

吏民心戶口歲增治為天下第一徵守京兆尹坐貶秩歸潁川前後八年郡中愈治是時鳳皇神爵數集郡國潁川尤多天子以霸治行終長者下詔稱揚賜爵關內侯黃金百斤秩中二千石後為丞相霸材長於治民及為相總綱紀號令風采不及丙魏于定國功名損於治郡

魏志梁習字子虞

陳郡拓人以別部司馬領并州刺史承高幹荒亂之餘胡狄在界張雄跋扈吏民亡叛入其部落兵家擁眾作為寇害更相扇動往往棊時習到官誘喻招納皆禮召其豪右稍稍薦舉使詣幕府邊境肅清百姓布野勤勸農桑令行禁止貢達名士咸顯於世太祖嘉之賜爵關內侯更拜為真長老稱



詠以爲自所聞識刺史未有及習者文帝時復爲  
刺史政治常爲天下最舊本習作集誤

墨子悲絲楊朱泣歧

淮南子曰楊子見逵路而哭之爲其可以南可以  
北墨子見練絲而泣之爲其可以黃可以黑高誘  
曰憫其本同而末異

朱博烏集蕭芝雉隨

前漢朱博字子元杜陵人哀帝時御史府吏舍百  
餘區井水皆竭又其府中列柏樹常有野烏數千  
棲宿其上晨去暮來號曰朝夕烏烏去不來者數  
月長老異之後二歲餘博爲大司空奏言高皇帝  
置御史大夫位次丞相今中二千石未更御史大

夫而爲丞相權輕非所以重國政也臣以爲大司  
空官可罷復置御史大夫遵奉舊制臣願盡力以  
爲百寮率從之迺更拜博御史大夫後爲丞相坐  
事自殺 蕭廣濟孝子傳蕭芝至孝除尚書郎有  
雉數千頭飲啄宿止當上直送至歧路及下直入  
門飛鳴車前

杜后生齒靈王出頰

晉書成恭杜皇后諱陵陽鎮南將軍預曾孫后少  
有姿色然長猶無齒有來求婚者輒中止及帝納  
采之日一夜齒盡生在位六年無子先是三吳女  
子相與簪白花望之如素柰傳言天公織女死爲  
之著服至是而后崩 左氏傳王子朝曰定王六



年秦人降妖曰周其有頤王亦克能修其職諸侯服享二世供職王室其有間王位諸侯不圖而受其亂災至于靈王生而有頤王甚神聖無惡於諸侯靈王景王克終其世

賈誼忌服莊周畏犧

前漢賈誼雒陽人年十八能誦詩書屬文稱於郡中河南守吳公聞其秀材召置門下及為廷尉迺言誼年少頗通諸家書文帝召為博士每詔令議下諸老先生未能言誼盡為之對人人各如其意所出諸生以為能帝說之超遷歲中至太中大夫誼以為漢興當改正朔易服色制度定官名典禮樂迺草具其儀帝謙讓未皇也然諸法今所更定

四十四

十四

四

皆誼發之天子以誼任公卿之位絳灌之屬害之於是上亦踈之不用其議以為長沙王太傅三年有服飛入舍止於坐隅服似鴉不祥鳥也誼既適居長沙卑濕自傷悼以為壽不得長迺為賦以自廣歲餘帝思誼徬之入見上方受釐坐宣室因感鬼神事而問鬼神之本誼具道所以然之故至夜半帝前席既罷曰吾久不見賈生自以為過之今不及也迺拜誼梁王太傅死年三十三孔臧鴉賦云昔賈生有識之士忌茲服鳥莊子曰或聘於莊子莊子應其使曰子見夫犧牛乎衣以文綉食以芻菽及其牽而入於太廟雖欲為孤犢其可得乎史記曰莊周蒙人嘗為蒙漆園吏與梁惠王同



時其學本於老子著書率寓言洗洋自恣以適已  
故王公大人不能器之楚威王聞周賢使使厚幣  
迎之許以爲相周引此辭應之郭象注云樂生者  
畏犧而辭聘

燕昭築臺鄭莊置驛

史記燕昭王即位卑身厚幣以招賢者謂郭隗曰  
齊因孤之國亂而襲破燕孤極知燕小力少不足  
以報然誠得賢士以共國以雪先王之恥孤之願  
也先生視可者得身事之隗曰王必欲致士先從  
隗始況賢於隗者豈遠千里哉於是昭王爲隗改  
築宮而師事之樂毅自魏往鄒衍自齊往劇辛自  
趙往士爭趨燕後與秦楚三晉合謀伐齊敗之齊

求一

十五

批解

城之不下者唯聊莒即墨餘皆屬燕孔文舉與曹  
公書曰昭王築臺以尊郭隗鮑昭樂府曰豈伊白  
璧賜將起黃金臺注云燕昭王置千金於臺上以  
延天下之士前漢鄭當時字莊陳人孝文時以  
任俠自喜脫張羽於阬聲聞梁楚間孝景時爲太  
子舍人每五日洗沐常置驛馬長安諸郊請謝賓  
客夜以繼日常恐不徧其知友皆大父行天下有  
名之士武帝時遷大司農當時爲大吏戒門下客  
至亡貴賤亡留門者執賓主之禮以其貴下人其  
推轂士及官屬丞史常引以爲賢於已聞人之善  
言進之上唯恐後山東諸公以此翕然稱鄭莊後  
陷罪起爲汝南太守卒家亡餘財先是下邳翟公



為廷尉賓客亦填門及廢門外可設爵羅後復為  
廷尉客欲往翟公大署其門曰一死一生迺知交  
情一貧一富迺知交態一貴一賤交情迺見  
瓊靖二妙岳湛連璧

晉書衛瓊字伯玉河東安邑人武帝時拜尚書令  
加侍中性嚴整以法御下視尚書若參佐郎若掾  
屬瓊學問深博明習文藝與尚書郎索靖俱善草  
書時號一臺二妙漢末張芝亦善草書論者謂瓊  
得伯英筋靖得伯英肉瓊筆勝靖然有楷法遠不  
能及靖靖字幼安敦煌人少有逸羣之量與鄉人  
汜衷張魁索紉索永俱詣太學馳名海內號稱敦  
煌五龍靖該博經史舉賢良對策高第累遷遊擊

將軍伯英芝字也 晉書潘岳字安仁滎陽中牟  
人少以才穎見稱鄉邑號為奇童謂終賈之儔也  
夏侯湛字孝若譙國譙人幼有盛才文章宏富善  
構新詞美容觀與潘岳亦善每行止同輿接茵京  
都謂之連璧岳美姿儀辭藻絕麗少時常挾彈出  
洛陽道婦人遇之者皆連手縈遶投之以果滿車  
而歸舉秀才名冠世為眾所疾遂棲遲十年出為  
河陽令負其才鬱鬱不得志後至黃門侍郎湛舉  
賢良對策中第終散騎常侍

卻詵一枝戴憑重席

晉書卻詵字廣基濟陰單父人博學多才環偉倜  
儻不拘細行州郡禮命並不應秦始中舉賢良對



策上第拜議郎遷雍州刺史武帝於東堂會送問  
詵曰卿自以為何如詵對曰臣舉賢良對策為天  
下第一猶桂林一枝崑山片玉帝笑詵在任威嚴  
明斷甚得聲譽後漢戴馮字次仲汝南平輿人  
光武時舉明經試博士後拜侍中正旦朝賀百寮  
畢會帝令羣臣能說經者更相難詰義有不通輒  
奪其席以益通者馮遂重坐五十餘席故京師為  
之語曰解經不窮戴侍中舊本馮作馮誤

### 鄒陽長裾王符縫掖

前漢鄒陽齊人為人有智略慷慨不苟合漢興諸  
侯王皆自治民聘賢吳王擗招致四方游士陽仕  
吳以文辯著名久之吳王以太子事怨望稱疾不

朝陰有邪謀陽奏書諫略曰今臣盡智畢議易精  
極慮則無國不可奸飾固陋之心則何王之門不  
可曳長裾乎然臣所以歷數王之朝背淮千里而  
自致者非惡臣國而樂吳民也竊高下風之行尤  
說大王之義願大王無忽王不納陽乃去從梁孝  
王遊卒為上客後漢王符字節信安定臨涇人  
少好學有志操耿介不同於俗以此遂不得升進  
乃隱居著書二十餘篇以譏當時失得號潜夫論  
後度遼將軍皇甫規解官歸鄉人有以貨得鴈門  
太守者亦去職還家書刺謁規卧不迎既入而  
問卿前在郡食鴈美乎有頃又白王符在門規素  
聞符名乃驚遽而起衣不及帶徒履出迎接符



而還與同坐極歡時人爲之語曰徒見二千石不如一縫掖言書生道義之爲貴也後竟不仕

鳴鶴曰下士龍雲間

晉書陸雲字士龍六歲能屬文性清正有才理少與兄機齊名雖文章不及機而持論過之號二陸幼時吳尚書閔鴻見而奇之曰此兒若非龍駒當是鳳雛後舉雲賢良吳平入洛雲與荀隱未相識嘗會張華坐華曰今日相遇可勿爲常談雲因抗手曰雲間陸士龍隱曰日下荀鳴鶴鳴鶴隱字也雲又曰旣開青雲覩白雉何不張爾弓挾爾矢隱曰本謂是雲龍駃駃乃是山鹿野麋獸微弩彊是以發遲華撫手大笑刺史周浚召爲從事謂人曰

士龍當今之顏子也官至中書侍郎與機同被害初雲嘗行逗宿故人家夜暗迷路莫知所從忽望草中有火光趣之至一家寄宿見一年少美風姿共談老子辭致深遠向曉辭去行十許里至故人家云此數十里中無人居雲意始悟却尋昨宿處乃王弼家雲本無玄學自此談老殊進

晉宣狼顧漢祖龍顏

晉宣皇帝諱懿字仲達河內溫縣孝敬里人姓司馬氏少聰朗多大略博學洽聞漢末大亂常慨然有憂天下心魏武爲丞相辟爲文學掾累遷相國武帝受禪上尊號曰皇帝帝內忌而外寬猜忌而權變魏武察帝有雄豪志間有狼顧相欲驗之



乃召使前行令反顧面正向後而身不動又嘗夢  
三馬同食一槽甚惡焉因謂太子丕曰司馬懿非  
人臣也必預汝家事太子素與帝善每相全佑故  
免 前漢高祖諱邦字季沛豐邑中陽里人姓劉  
氏母媪嘗息大澤之陂夢與神遇是時雷電晦冥  
父太公往視則見交龍於上已而有娠遂產高祖  
高祖為人隆準而龍顏美須鬣左股有七十二黑  
子寬仁愛人意豁如也常有天度不事家人生產  
作業

鮑靚記并羊祜識環

晉書鮑靚字太玄東海人年五歲語父母云本是  
曲陽李家兒九歲墮井死其父母訪問皆符驗靚

四七

卷一

十九

恒

學兼內外明天文河洛書後遷南海太守嘗見仙  
人陰君授道訣百餘歲卒 晉書羊祜字叔子泰  
山南城人世吏二千石至祜九世並以清德聞祜  
年五歲時令乳母取所弄金環乳母曰汝先無此  
物祜即詣鄰人東垣桑樹中探得之主人驚曰此  
吾亡兒所失物云何持去乳母具言之李氏悲惋  
時人異之謂李氏子即祜之前身也祜博學能屬  
文魏高貴鄉公時公車徵拜中書侍郎武帝有滅  
吳之志以祜都督荊州諸軍事出鎮南夏累進征  
南大將軍南城侯卒贈太傅初有善相墓者言祜  
祖墓所有帝王氣若鑿之則無後祜遂鑿之相者  
見曰猶出折臂三公祜立元墮馬折臂仕至公而無



子祐樂山水每風景必造峴山置酒言詠終日不  
倦襄陽百姓於祐平生遊態之所建碑立廟歲時  
享祀望其碑者莫不流涕杜預因名爲墮淚碑荆  
州人爲祐諱名云

仲容青雲叔夜玉山

晉書阮咸字仲容陳留尉氏人任達不拘與叔父  
籍爲竹林之游當世譏其所爲咸與籍居道南諸  
阮居道北北阮富而南阮貧七月七日北阮盛曬  
衣服錦綺粲目咸以竿挂大布犢鼻於庭曰未能  
免俗歷散騎侍郎妙解音律善彈琵琶雖處世不  
交人事唯共親知絃歌酣宴而已荀勗每與咸論  
音律自以爲遠不及疾之出補始平太守顏延年

作五君詠其一曰仲容青雲器實稟生民秀達音

何用深識微在金奏郭奕已心醉山公非虛勸屢  
薦不入官一麾乃出守晉書嵇康字叔夜有奇

才遠邁不羣美詞氣有風儀而土木形骸不自藻

飾人以爲龍章鳳姿天質自然恬靜寡欲含垢匿

瑕寬簡有大量博覽該通長好老莊與魏宗室婚

拜中散大夫所與交者唯阮籍山濤預其流者向

秀劉伶阮咸王戎爲竹林之遊世所謂竹林七賢

也戎與叔夜居山陽二十年未嘗見其喜愠之色

世說曰叔夜之爲人嵒嵒若孤松之獨立其醉也

傀俄若玉山之將頽

毛義奉檄子路負米



後漢毛義字少節廬江人少貧以孝行稱南陽張奉慕其名往候之坐定而府檄適至以義守令義奉檄而入喜動顏色奉者志尚士也心賤之自恨來固辭而去及義母死去官行服數辟公府爲縣令進退必以禮後舉賢良公車徵不至張奉歎曰賢者固不可測往日之喜乃爲親屈所謂家貧親老不擇官而仕者也章帝下詔褒寵義賜穀千斛常以八月長吏問起居加賜羊酒壽終于家○家語仲由字子路見孔子曰負重涉遠不擇地而休家貧親老不擇祿而仕昔由事○親之時常食藜藿之實爲親負米百里之外親沒之後南遊於楚從車百乘積粟萬鍾累茵而坐列鼎而食願欲食藜藿爲親負米不可得也子曰由也事親可謂生事盡力死事盡思者也

### 江革巨孝主覽友弟

後漢江革字次翁齊國臨淄人少失父獨與母居遭亂負母逃難備歷阻險常採拾以爲養數遇賊或劫欲將去革輒涕泣言有老母辭氣愿款有足感動人者賊不忍犯之革轉客下邳窮貧裸跣行傭以供母建武末與母歸鄉里至歲時縣當案比革以母老不欲搖動自在轅中輓車不用牛馬由是鄉里稱江巨孝及母終舉賢良方正遷司馬長史肅宗崇禮之拜諫議大夫賜告歸因謝病常以八月長吏存問致羊酒以終厥身巨孝之稱行於



天下舊本巨作忠非

亞書王覽字玄通母朱遇

兄祥無道覽年數歲見祥被楚撻輒涕泣抱持每諫其母母少止凶虐朱屢妄以非理使祥覽輒與俱又虐使祥妻覽妻亦趨而共之朱患之乃止祥喪父後漸有時譽朱深疾之密使酖祥覽知之徑起取酒祥疑其有毒爭而不與朱遽奪反之自後朱賜祥饌覽輒先嘗覽孝友恭恪名亞於祥仕至光祿大夫門施行馬

蕭何定律叔孫制禮

前漢高祖初入關約法三章曰殺人者死傷人及盜抵罪蠲削煩苛秦民大說其後四夷未附兵革未息三章之法不足以禦姦於是相國蕭何據撫

秦法取其宜於時者作律九章高祖布衣時何數以吏事護高祖高祖為沛公何嘗為丞督事沛公至咸陽諸將皆爭走金帛財物之府分之何獨先入收秦丞相御史律令圖書藏之沛公具知天下院塞戶口多少疆弱處民所疾苦者以何得秦圖書也高祖即位論功行封以何功最盛先封酈侯前漢叔孫通薛人秦時以文學待詔博士降漢拜博士號稷嗣君漢王為皇帝悉去秦儀法為簡易羣臣飲爭功醉或妄呼拔劍擊柱上益厭之通說上願徵魯諸生與臣弟子共起朝儀頗采古禮與秦儀雜就之上使徵魯諸生與其弟子為酈野外習之月餘通曰上可試觀七年長樂宮成諸侯



羣臣朝十月行禮畢置酒以尊卑次起上壽觴九  
行謁者言罷酒御史執法舉不如儀者輒引去竟  
朝無敢謹諱失禮者帝曰吾乃今日知爲皇帝之  
貴也拜通爲奉常賜金五百斤

葛豐刺舉息躬歷詆

前漢諸葛豐字少季琅邪人以明經爲郡文學特  
立剛直元帝擢爲司隸校尉刺舉無所避京師爲  
之語曰聞何闊逢諸葛上嘉其節加秩光祿大夫  
前漢息夫躬字子微河內河陽人少爲博士弟子  
受春秋通覽記書哀帝擢光祿大夫給事中上疏  
歷詆公卿大臣曰方今丞相王嘉健而蓄縮不可  
用御史大夫賈延隨弱不任職左將軍公孫祿司  
隸鮑宣皆外有直項之名內實駸不曉政事諸曹  
以下僕遼不足數卒有彊弩圍城長戟指闕陛下  
誰與備之

補注蒙求卷第一





大清宣統元年...

...

...

...

...





